


卷之三

63

对  
4  
3



續文獻通考卷之六十三

皇明進士雲間王圻纂輯

節義考 忠臣二

後梁

王彥章字子明鄆州壽昌人末帝時為鄆州防禦使與唐  
 將夏魯奇戰馬蹶被執莊宗愛其驍勇欲全活之彥章  
 曰朝事梁暮事晉何面目見天下人乎終不從遂見殺  
 張源德梁末守貝州時郡邑皆歸晉獨貝州堅守或勸出  
 降不從遂被害



後唐

姚洪以指揮使戍閬州梁將董璋破閬州執洪不屈燬鑊于前令壯士剖其肉而食洪至死罵不絕口明宗聞之泣下錄其二子

夏魯奇字邦傑唐莊宗賜姓名曰李紹奇常解莊宗重圍又擒王彥章官河陽節度使徙忠武後董璋攻遂州魯奇閉城拒之旬月救兵不至城中食盡自刎死

張敬達為唐將契丹兵圍之楊光遠勸敬達降敬達不忍背唐謂曰何不殺我降光遠即斬敬達降契丹後耶律

德光哀其忠遣人收葬

裴約唐澤州刺史時李繼韜以潞州留後叛降唐來攻澤州約泣以諭衆曰吾死不從也嬰城自守城陷死之唐主憫其忠為立祠

後晉 沈斌祁州刺史時趙延壽引契丹兵攻祁州斌在城上延壽語之曰使君何不早降斌曰侍中父子失計陷身虜庭恐帥犬羊以殘父母之邦不自媿耻更有驕色何哉明日城陷斌自殺

後周 韓通為周侍衛親軍副都指揮使恭帝元年遣宋

續文獻通考  
祖帥師禦漢至陳橋為諸軍推戴通謀率眾禦之軍校  
王彥昇逐焉通馳入其第未及闔門為彥昇所害妻子  
俱死後宋祖贈通中書令以禮收葬

後蜀 高彥儔為江寧制置使太祖乾德二年曹彬帥師  
至夔蜀彥儔拒之力戰不勝奔歸府第整衣冠望西北  
再拜縱火自焚死光義得其骨於灰燼中以禮葬之

南唐

劉仁贍為壽州節度使堅守不下世宗遣使招降其子崇  
諫應其招仁贍立命斬之監軍周廷構以城降周仁贍

遇害周以壽州為忠正軍以旌仁贍之節

李延鄒為泗州叅軍時周主自將伐唐攻濠泗州唐郭廷  
謂知唐不能救命延鄒草降表延鄒責以忠義廷謂以  
兵臨之延鄒擲筆曰大丈夫終不負國為叛臣作降表  
廷謂斬之

張彥能南唐楚州守將也周世宗攻之與其副鄭昭業戰  
死所部千餘人皆無降者

孫晟密州人仕南唐為右僕射及使周謂其副王崇質曰  
吾終不負永陵一杯土世宗召問江南事不對乃收下



獄臨刑怡然南望拜曰臣惟以死報國唐主贈魯國公  
鍾清為江南主勤政學士時曹彬克金陵清朝服坐于家  
兵及門舉族死之

胡則為唐指揮使時曹翰攻江州不下刺史謝彥實集眾  
謀納款則謂其下曰吾屬世受李氏恩安忍負之刺史  
不忠欲背國爾曹能從我乎眾皆聽命乃與同列宋德  
明等攻彥實執而殺之集眾為唐固守城陷翰執之數  
其拒命之罪對曰犬吠非其主公何怪也翰殺之

陳喬為唐門下侍郎開寶八年曹彬克金陵喬與張洎約  
同死社稷然洎實無死志至是喬徑入白唐主曰今日  
國亡願加顯戮以謝國人唐主曰此乃曆數卿死無益  
也喬曰縱不殺臣臣何面目對士人乎遂自經死

宋

秦傳序江寧人淳化五年以夔陝巡檢使禦李順亂城陷  
父子皆死太宗錄其次子煦為殿直煦死復以煦弟昉  
為三班奉職

康保裔為瀛州都部署真宗咸平二年契丹侵瀛州圍之  
數重左右請保裔易甲以遁保裔曰臨難無苟免正吾

續文獻通考  
效死之日也遂決戰數十合兵盡矢絕而援不至保裔  
與宋順俱死之

劉紹榮為益州都巡檢使時咸平三年益州戍卒作亂紹  
榮死之

裴濟為靈州知州咸平五年趙保吉集蕃部來攻靈州濟  
被圍餉絕刺指血染奏求救兵不至城遂陷濟死焉

景林洙通州人咸平間王均叛州有賊應之者林洙將鄉  
兵拒戰為賊所戕首墮而身不仆跨馬奔歸州城東北  
隅人訝而呼之曰公無首矣于是始墜邦人即其地立

祠

劉平為鄜延路副總管仁宗景祐時元昊寇延州平帥師  
往援與賊大戰衆潰平被執死之贈朔方節度使兼侍  
中

高敏登州人慶曆中為涇源指揮使與西夏力戰而死贈  
嘉州刺史錄其三子

任福開封人慶曆中元昊寇渭州不屈死節贈武勝軍節  
度使賜第一區給其家錢及粟麥追封母妻錄其子

耿昭化河南人仕為蜀州司戶叅軍盜據城欲脅以官昭



化大罵至斷手足不屈而死

耿傳昭化子以父蔭累官通判儀州徙慶州元昊入寇叅任福行營軍事諸將失利或勸傳避之傳愈前指顧自若被數創乃死詔贈右諫議大夫官其四子

王珪涇源都監也元昊入寇珪從任福戰好水川福陷圍中珪誓以死報國復入援福殺數十百人鞭撓掌裂奮擊自若矢中目乃還夜卒

張憲為武畧大夫慶曆時貝州宣毅卒王則據城以叛憲與其子琳同死之贈武功大夫官其兩子

馬遂開封人為北京指揮使王則叛賈昌朝使持榜入貝州招降既見則諭以禍福不答遂奮起抵則拒其喉毆之流血賊黨攢刃聚謀乃縛而支解之事聞仁宗嘆息久之贈宮苑使官其五子

董元亨深州人仁宗時以貝州通判罵王則為所害贈太常少卿錄其子三人

李英高要人為欽州推官死儂寇之難一家十有三人贈比部郎中廟食高要

宋士堯馬平人與儂寇力戰于邕州敗北賊斷其首屍不

什猶奔馬而還贈屯衛大將軍

曹覲字仲賓建安人為建州司戶叅軍皇祐中知封州儂智高叛攻封州率徒決戰不勝被執賊戒勿殺梓使拜且誘以美官覲不肯拜且詈賊猶惜不殺徙置舟中覲兩日不食賊知其無降意害之至死詬賊不絕事聞贈太常少卿錄其四子後立廟封州

張拱廣西都監也儂賊圍邕州拱自州來援既入而城陷不屈而死踰月得其屍如生

王正倫以太尉將兵擊儂賊戰死于難子景仁即其地結

草堂祠之朝廷嘉其節贈節度使謚曰忠顯

張日新安仁人皇祐間為廣西邕州都監儂智高陷邕日新力戰不支被執不屈死之

孔宗旦魯人皇祐中以邕州司戶叅軍叱罵儂智高為所害贈太子中允

趙師旦積之從子皇祐中以太子右贊善大夫移知康州奮罵儂賊被害贈光祿少卿賜其母長安縣太君冠帔官其子弟并從子三人

王從政為閣門祇候與儂賊戰于太平場被執以沸湯沃



之終不屈而死贈信州刺史錄其孫三人

梁仲寶賓州人儂賊犯境率衆力戰死之郡人為立廟

徐璽博白人為宜州長史追儂賊至金城驛力戰死之贈

大理丞

郭恩開封人累官秦隴路兵馬鈐轄嘉祐中夏人入寇臥

牛峯恩與力戰自旦至食時失利被執不屈自殺贈同

州觀察使錄其子弟有差

張吉為淮安鎮守烽卒神宗熙寧三年夏人寇慶州吉為

夏人所掠驅至城下呼令降吉反其辭賊怒害之至死

罵不絕口事聞贈內殿崇班勇烈將軍錄其子

景思忠字進之普州安岳人神宗時以遂州駐泊都監與

夷人力戰而死官其子及同死者之子七人

王竒汾州人神宗時以廣西都監死于蠻寇贈皇城使忠

州防禦使官其後六人

蘇緘晉江人為邕州知州熙寧九年交趾人圍邕緘悉力

拒守外援不至城遂陷緘殺其家三十六人因自焚死

城中人感緘之義無一人從賊者帝聞之嗟悼贈奉國

軍節度使謚忠勇邕人為立祠元祐間賜額懷忠子明

正孫廣淵直溫與緘同死皆蒙褒贈

高永能元豐初破夏人有功進榮州團練使元豐五年夏人寇永樂城陷其孫昌裔欲挾之從間道走永能嘆曰吾結髮與西羌戰未嘗挫今年已七十受國恩恨無以報此吾死所也遂戰而死詔贈房州觀察使錄其子世亮為忠州刺史

張建侯政和中為辰州守與盧陽令王憲之救鎮江寨為賊黃安俊所執迫使諭寨中人出降建侯給諾至寨下大呼曰為人當識順逆我萬無求全汝等堅守勿二賊

怒并憲之俱害之郡人立祠以祀

徐禧分寧人元豐中城永樂禧以給事中被詔與內侍李舜舉往相其事會賊趨新城禧亟往禦或曰被詔相城禦寇非職也禧不聽與舜舉俱至永樂城陷死之贈吏部尚書謚忠愍

高永年河東番官也崇寧初知岷州為降羌所執死之彭汝方知衢州徽宗宣和初方臘陷城汝方罵賊以死贈龍圖閣直學士謚忠毅官其家七人

鞠嗣復宣和初知休寧縣為方臘所得不屈賊不忍加害



續文獻通考  
卷之九  
辛生還

宋旅字庭實莆田人知剡縣不屈於方臘而死贈朝散郎  
錄其四子

詹良臣字元公睦州分水人以縉雲尉不屈于方臘被害  
贈通直郎官其子孫二人

丁仲修字敏之温州人方臘陷樂清將渡江巡檢陳奎往  
捕死之賊至仙遊夏祥遣輔褒迎戰數十合褒死之仲  
修乃率鄉兵禦諸樂灣力屈而死

項德武義人郡之禁卒也與方臘戰于黃姑嶺下死邑人

哭聲振山谷圖其像歲時祝之

蔣煜仙居人有文學方臘欲妻以女煜辭之曾以拜亦不  
從寇曰吾戮汝矣煜伸頸就刃詈聲不絕而死

胡壘為婺州教授遇方臘作亂以武奮遇害舉家死之詔  
贈奉議郎推恩二子

王行之太平人初除婺州士曹方臘黨寇婺州守臣皆遁  
去行之曰吾獄官也守吾職死分耳遂遇害事聞贈通  
直郎官其一子

毛粟字淑鎮江山人以特恩為歙士曹睦寇攻城官吏皆

遯粟曰吾職司寇獄有繫囚義不可去乃攝州事時三子貢辟雍即遣人持獄印縋城以出令獻于朝城陷粟坐府上賊脅使降不屈罵賊不絕口死之妻錢氏掖其姑弗忍去俱遇害事聞贈朝請郎官其後三人劉士英宣和中通判太原府與將士王稟俱死于金寇程迪宣和中從楊惟中征方臘有功累遷榮州團練使時金人入寇詔以迪提舉永興路軍馬及永興破迪率其徒力戰身被創幾徧絕而復蘇猶厲聲叱戰不已遂死之詔贈明州觀察使謚忠愍

張克戩字德祥侍中耆曾孫也宣和間知汾州與虜力戰而死一門同死者八人贈延康殿學士銀百兩絹五百匹紹興中謚忠確

傅察字公晦孟州濟源人宣和七年以太常少卿奉使金虜迴至境上幹離不脅之降不屈死之

江仲明台州人宣和間寇亂載老母逃山澗中猝遇寇逼使降仲明奮起罵賊死之

朱昭字彥明府谷人宣和中為震武城兵馬監押攝知城事金人逼城盡殺其家人死守後中矢而死



張甲德興人為邕州巡檢宣和時金兵犯順甲力戰死德祐元年詔贈忠利侯

史抗濟源人宣和末為代州沿邊安撫副使金人圍代急抗夜呼二子稽古稽誓曰吾昔語用事者鴈門宜擇帥增戍彼皆不吾省今城必陷吾將死事汝輩亦勿以妻子為念而負國也二子泣曰惟命明日城破父子三人突圍力戰死于城隅

李翼麟州人宣和末為代州西路都巡檢使金人取代遣使諭降翼射却之後兵敗被執粘罕欲臣之怒罵不屈

而死同時不屈而死者縣令李聳丞王唐臣尉劉子英監酒闌城將官折可與

陸有常知臨淄縣臨朐土兵作亂有常率兵拒守死于陣知益都張侃千乘縣丁興宗亦死之

孫益以福州觀察使知朔寧府被命救太原時張孝純已將太原降金不肯啟門遂死之初益奏郡人孫谷為掾屬至是嘆曰吾身已許國又不忍負孫公亦死之

張確守隆德府時粘沒喝入威勝軍或勸確潰圍出確斥曰吾守王臣頭可斷膝不可屈力戰而死

种師中洛陽人累官奉寧軍承宣使會金人內侵師中戰死贈少師謚莊愍

李彥仙字少巖鞏昌人為陝州知州靖康元年金婁室攻陝竒彥仙才百端諉陷彥仙悉斬其使力盡城陷投河死贈彰武軍節度使建廟商州號忠烈官其子給宅一區田五頃謚忠威時裨將龍門邵雲夏縣呂員登陝縣宋炎與賈何關平趙成皆死並贈官

杜翊世華陽人通判懷德軍靖康初金兵奄至城陷翊世先火其家與妻張同縊死贈朝議大夫官其後十人名

所居曰忠義坊

高子儒狄道人知蘭州龕谷寨金人陷熙河子儒聞副總管劉惟輔戰死力窮莫支乃先自刃其家與軍將韓清皆罵而賊而死

黃璘字邦美浦城人登政和八年第後丞拱州靖康元年金人襲拱州城陷虜迫郡縣吏役為鄉導璘移病不出虜驅迫之遂赴井死事聞贈朝奉郎官其弟之子為璘後

蔣興祖常州宜興人徽宗時知揚武縣靖康初金兵犯京



師道遇楊武或勸使避興祖曰吾世受國恩當死于是與妻子留不去及師至力不敵死焉年四十四詔贈朝散大夫

楊震字子發代州崞人靖康中知麟州守建寧砦與子居中執中俱死建炎二年贈武經郎長子存中貴請于朝謚恭毅

曾悟字蒙伯肇之孫靖康中為亳州士曹金人破城抗辭慢罵衆必劓之屍體無存者妻孥同日被害

李震汴人靖康初金人迫京師震時為小校率所部三百

人出戰殺人馬七百餘已而被執問南朝皇帝所在震曰我官家非爾所當問鬻割垂盡猶罵不絕口

司馬朴光兄旦之孫靖康初以兵部侍郎使金握節而死贈兵部尚書謚忠潔

郭忠孝字立之洛陽人少以父達任補官舉進士累遷河東路提舉坐事靖康初為永興軍路提點刑獄及金人寇永興兵寡或勸忠孝以監司出巡可以避禍忠孝不答與經畧唐重分城而守金人陣城下忠孝募人以神臂弓射之敵不得前已而城陷忠孝死之贈大中大夫

續文獻通考  
歐陽詢字全義廬陵人靖康中以將作監臣出使極言相  
宗之地不可割時宰怒欲殺詢迺遣詢奉使割深州詢  
至深州城下慟哭謂城上人曰朝廷為奸臣所誤吾已  
辦一死來矣汝等宜勉為忠義報國金人怒執送燕焚  
死之詔錄其忠無子官其壻曾敏恭

姜綬麗水人以忠勇士召募刳股藏書縋下南壁將往南  
京求援為金邏騎所獲厲聲叱罵被害官其子特立承  
信郎

徐徽言西安人靖康中知晉寧軍兼嵐石路沿邊安撫使  
晉寧不守金挾徽言去不屈死之統副孫昂及士卒皆  
不屈被害事聞贈晉州觀察使謚忠壯再贈昭化軍節  
度徽言子岡從孫適俱死事世著忠義

孫昂靖康初為太原路兵馬都監與徽言協志禦虜後引  
刀欲自刎為金人所奪擁至軍前不屈而死贈成忠郎  
團練使昂父翊宣和中知朔寧州抹太原死于陣亦世  
濟忠義云

李珙永福人官至武功大夫金虜犯闕召天下兵珙謂蔣  
炳文曰主憂臣辱主辱臣死豈可以道遠便自營私乎



募死士三千人倍道兼行與賊戰死之贈忠州防禦使  
宋炎陝縣人蹶張命中補秉義郎金人圍城射死數百人  
北再圍以勁弩發毒矢殺千餘人城陷虜求善射者官  
之炎不應尤戰死

李若水字清卿曲周人靖康中為吏部侍郎帝如青城至  
金營金人逼帝易服若水抱持而哭詆金人為狗輩金  
人曳若水出擊之且令曰必使李侍郎無恙若水絕不  
食或勉之曰事無可為者今日順從明日富貴矣若水  
嘆曰天無二日若水寧有二主哉其僕亦慰解之曰公

父母春秋高若少屈冀得一歸覲若水叱之曰吾不顧  
家矣後旬日粘沒喝召計事若水因歷數而罵之監軍  
撻破其古噀血罵愈切至以刃裂頸斷舌而死金人亦  
相與言曰遼國之亡死義者十數南朝惟李侍郎一人  
呂由誠字子明誨之季子以父恩補官靖康初徙知集慶  
府時羣盜蜂起崎嶇至都金兵來攻由誠與判官趙令  
佳同心誓守城陷俱被執不屈死之

龔端新昌人欽宗稱其凜凜有直臣節後奉使河東路聞  
二帝北狩憤惋而卒

程振樂平人靖康中拜刑部侍郎金人寇汴梁索金帛無  
厭振與梅執禮等四人詣金營言比屋盡空無以塞命  
虜酋怒遂遇害贈端明殿學士謚剛愨

孫鉉自眉徙居戎州為博士二帝北狩金人以鉉有名上  
庠指名擢取之義不屈以死

王履以脩武即副李若水使金抗虜不屈與若水俱死臨  
死畧無懼色且敬詩末章云矯首問天兮天卒無言忠  
臣效死兮死亦何憊人聞而悲之

劉韜字仲偃崇安人第進士靖康中以資政殿學士充河

北宣撫副使太原陷召入覲為京城四壁守禦使京城  
失守遣使金營金人欲用之歸書片紙使親信持報諸  
子即沐浴更衣酌卮酒而縊建炎初贈資正殿大學士  
累贈太師謚曰忠顯

吳革字義夫華陽人靖康初為閣門宣贊舍人女直立張  
邦昌為楚帝革率眾討邦昌不克死之

吳懋晉陵人靖康末仕為禮部員外郎金人立張邦昌王  
時雍用事坐政事堂懋發憤罵之曰反虜吾不能擊汝  
如段秀實即時雍面頸俱赤後吳玠莫儔以表狀詣虜



營懋竟不屈

郭許德順中安堡人靖康中為涇原副將不降金虜而死  
贈武翼大夫忠州刺史同死者西安朱友恭亦涇原副  
將贈敦武郎

王士言武舉進士靖康中畢力禦金虜死于澤州贈拱衛  
大夫忠州團練使官其後五人

祝公明慶州麗水人為太原府益縣主簿靖康中與金人  
力戰而死贈承事郎子陶為唐州司戶亦死官所

陳邁知中山府為金師所圍半年外無援師京都既陷割

兩河求和邁弟光祿卿適至中山臨城諭旨邁遙語曰  
主辱臣死吾兄弟平居以名義自處寧肯賣國家作囚  
奴乎適泣曰兄但盡力勿以弟為念後為步將沙振所  
害及其子錫并僕妾十七人建炎初贈特進

李熙靖晉陵人提舉醴泉觀邦昌使直學士院固拒不食  
而卒贈延康殿學士

謝颺汝州人欽宗即位上封事十篇論事切至金人犯汝  
州颺自襄陽領兵往援力戰而死

李涓南豐人靖康之難率兵勤王至蔡州與金人戰死之

高宗官其二子

霍安國靖康中知懷州城陷一門無噍類高宗建炎元年詔諸路詢死節之臣以聞贈延康殿學士

張叔夜永豐人從淵聖北行至白溝河仰天大呼扼吭而卒建炎紹興間塋衣冠于寶積院之西朝廷褒其節詔有司即墓立廟賜額旌忠謚忠文

李邈字彥思清江人靖康中以青州觀察使知真定城陷金人欲其被髮左衽邈自去髮為浮屠遂遇害高宗贈昭化軍節度使謚忠壯

劉翊靖康中為真定府路都鈐轄金兵逼之解縲自縊死徐揆衢州人靖康中以太學生上書金酋請還二帝為所殺建炎中贈宣教郎官其後

郭永大名元城人為北京提刑建炎二年女直陷北京永死之家屬皆遇害

劉汲丹陵人為鄧州安撫使時女直陷鄧州汲死之通判鄭州趙伯振知穎昌府孫默知汝陽府郭贊皆不屈死劉倚友字夢澤處州人靖康初以進士宰開封金人犯闕受檄為東壁彈壓官登城按視為寇所獲脅使降倚友



罵不絕口死之

孫昭遠字顯叔眉山人建炎中為河南尹金兵來攻衆欲  
擁昭遠南還昭遠罵曰若等衣食縣官不以此時報國  
耶叛兵怒反擊昭遠遂遇害官屬無免者贈徽猷閣待  
制

唐重字聖任眉州彭山人建炎中為永興軍經畧使知京  
北府城陷不屈而死贈資政殿學士謚恭愍時副總管  
相宗閔提舉軍馬程迪等俱死之

曾孝序字逢原晉江人建炎初知青州金兵至為叛卒所  
害城遂陷贈孝序光祿大夫謚威愍子許承議郎餘贈  
官有差

陳求道字得之咸寧人建炎中為襄鄧隨郢鎮撫未幾招  
撫劉忠叛欲奉求道為主求道正色斥罵賊拔出舌斷  
之妻及二子俱被害

王琦弓門砦巡檢建炎中禦金人于熙河金人立招降旗  
衆皆招拜珂獨不拜金人殺之

楊粹中真定人建炎二年知濮州時金人入寇粹中固守  
月餘城陷粹中登浮圖不下粘罕嘉其忠義許以不死

粹中竟不屈而死事聞贈徽猷閣待制

向子韶字和卿敏中之從孫舉進士累官京東轉運使高宗朝知淮寧府金人犯城子韶親擐甲冑率諸弟誓以死守及城陷為賊所執執手責罵金人殺之闔家遇害贈通議大夫謚忠毅

周中維州人建炎二年金人攻城中率家衆乘城拒守城陷闔門死之紹興六年贈官

杜昉為密州通判建炎初寓居武陵賊鍾相亂欲強使從已昉罵不絕口遂遇害

上官悟字仲達用陰累官秘閣修撰充京畿轉運使建炎三年為京東副留守時劉豫叛降金因遣人說降悟斬其使復賂悟左右使說悟復斬之金兵攻東京愈急力不能支城陷死之贈右文殿修撰官其後五人

王復知徐州建炎三年女直陷徐州復死之闔門百口皆被殺贈資政院學士謚壯節

章雲就麗水人建炎中賊將逼處州雲就以守將募往諭降賊許諾既而官兵掩至賊以為賣已遂遇害後人立祠祀之



張績金壇人建炎中守揚州金兵圍城城陷績及妻子皆死之

楊邦乂吉水人政和進士知溧陽縣僕射杜充降金濟江鼓行迫城李稅陳邦光率官屬迎拜邦乂以血書衣裾曰寧作趙氏鬼不為他邦臣金將宗弼遣人說之明日遙望宗弼大罵宗弼怒剖其心事聞贈直秘閣賜田三頃官為殮葬即其地賜廟褒忠謚忠襄官其四子

崔縱字元矩臨川人高宗將遣使通問二帝縱毅然請行乃授朝請大夫右文殿修撰試工部尚書以行比至首

以大義責金人請還二帝又三遺之書金人怒徙之窮荒縱不為少屈久之金人許南使自陳而聽其還縱以王事未畢不忍言又以官爵誘之縱以志恨成疾竟握節以死洪皓還始歸縱之骨詔以兄子延年為後

洪皓樂平人建炎初使金不屈欲殺之一酋曰此忠臣也為請免死得流冷山凡一十五年恒以仁者以大事小智者以小事大章諭金酋故宋得與金和歸卒謚忠宣吳安國字振卿處州人紹興中以太常少卿使金值金人渝盟拘留脅服之安國毅然正色曰我首可得我節不

可奪惟知竭誠死王事王命惡敢辱金人不敢犯遣還  
後知袁州卒

朱弁建安人文公叔父紹興中副王倫使金金人令使與  
副探籌歸報弁曰吾將命出國門已置死生度外豈幸  
得先歸哉古者使人有節今無節有印願以印留于我  
正使先歸吾獨在此于是倫解印與之而歸弁留金十  
餘年備嘗艱苦後與洪皓俱歸至今子孫有留印堂

林冲之字和叔莆田人靖康初以主客郎中副中書侍郎  
陳過庭使金同被拘執初猶給乳酪迨宇文虛中受其

命金人亦以是邀之冲之奮勵見詞色金人怒徙之奉  
聖州二年過庭卒金人逼冲之任偽齊不屈徙上京又  
不屈置顛州極邊沍寒之地幽佛寺十餘年漸復飲茹  
以義命自安髭髮還黑病亟語同難者曰某年七十二  
持忠入地無恨所恨者國讐未復耳南向一慟而絕僧  
窆之寺隅洪皓歸朝以聞詔與二子官過庭亦卒于燕  
建炎中謚忠肅

滕茂實字秀穎東陽人一云臨安人靖康元年以工部員  
外郎假工部侍郎副路允迪出使為金人所留時茂實



兄絢通判代州已先降金粘罕素聞茂實名乃遷之代州又自京師取其弟華實同居以慰其意欽宗自離都城舊臣無敢候問啟居者茂實聞欽宗將至即自為哀詞且篆宗工部侍郎滕茂實墓九字取奉使黃幡裹以授其友人朔寧府司理董詵欽宗及郊茂實具冠幘迎謁拜伏號泣金人諭之曰國破主遷所以留公益將大用逼令易服茂實力拒不從見者墮淚茂實請從舊主俱行金人不許憂憤感疾卒雲中詵歸錄所為哀詞言于張浚以詵為陝西轉運判官上其事紹興二年贈龍

圖閣直學士官其家三人

魏行可建州建安人建炎中以太學生應募奉使補右奉議郎假朝奉大夫尚書禮部侍郎充河北金人軍前通問使時河北紅巾賊甚衆行可始懼為所攻既而見使旌皆引去行可見金人于澶淵金人知其布衣借官待之甚輕留不遣行可嘗貽書金人警以不戢自焚之禍大國舉中原與劉豫劉氏何德趙氏何罪若亟以還趙氏賢于奉劉氏萬萬也紹興六年卒十三年張邵來歸言行可執節没于王事行可父通直即伯能亦愬于朝

遂贈朝奉郎秘閣修撰先已官其二子一弟至是復官  
其一孫行可之使也吳人郭元邁以上舍應募補右武  
大夫和州團練使為之副不肯髡髮棄官亦卒于北  
閩進隸宣武建炎初遣使通問進從行既至雲中府金人  
拘留使者散處之進亡去追還留守高慶裔問何為亡  
對曰思大宋耳又問我主待汝有恩汝亡何故進曰錦  
衣玉食亦不戀也慶裔義而釋之凡三亡乃見殺臨行  
進謂行刑者吾南面受刃南則我皇帝行在也行刑者  
曳其臂令面北進踴身直起盤旋數四卒南面就死  
朱勳為武進校尉從使者至北在粘罕所為求妻室固其  
意不半月亡去追之還勳含笑死挺下

李之邵建炎初為新喻武尉隆祐太后幸虔州從後軍叛  
之邵拒之兵敗不屈大罵賊虺殺之賊酋壯其言誅害  
之邵者

易青惠州人為都督行府摧鋒軍經畧使效用紹興中為  
廣賊所執終不從賊怒焚死之贈保義郎閣門祇候  
何斌為殿前司將官童德興提禁旅戍邵武紹興中竭力  
禦盜而死其屍殭立移時始仆贈武節大夫錄其後一



人

連萬夫建炎四年郡賊犯應山破之賊知萬夫勇敢謀欲留萬夫萬夫怒厲聲罵賊為所害贈右承務郎

鄭覃字季厚明州人靖康二年貢于鄉建炎四年金人陷明州覃為兵所劫去逼使之降厲辭罵不屈躍入水中死妻董亦自沈後以孫清之顯貴贈太師秦國公董秦

國夫人

趙立徐州益村人建炎四年以鎮撫使兼知楚州堅守孤城為飛砲所中而卒贈奉國節度使儀同三司官其子

孫十人謚忠烈

阮駿字千里莆田人紹聖初登進士第建炎初為河南府少尹金人來寇拒戰不利亟收兵護神御殿而以餘兵再戰兵敗抱神御罵賊至死聲不絕口特贈奉直大夫薛慶起羣盜據高郵後歸朝與金人力戰而死贈保寧軍承宣使官其家十人封其妻顧氏

楊照濠州將官也金人圍城照刺賊洞腹抽腸俄中流矢死有都統丁金者遇賊十八里洲被圍大呼其徒勉以毋得負國一舟二百人皆鬪死並贈承信郎錄其後

樊昌進賢人建炎初以書生為閣門祇候舍人王虎謀逆率鄉民力戰死之紹興中贈修職郎

凌唐佐字公弼休寧人登元符進士建炎初知建康府城陷劉豫使守應天唐佐欲圖豫密疏虛實上于朝事泄被捕見豫責豫曰國家何負于汝而反面事虜耶豫怒命引出斬之事聞贈徽猷閣待制

閻琦靖康中為承務郎二帝北遷後宗室南渡不及者多散民間豫募人索之琦匿不以聞為豫杖死

劉化源曜州人知隴州城陷被執金使人守之不得死遂

驅入河北鬻蔬果隱民間十年終不屈辱同時原州通判朱璞簽書博州判官劉長儒皆與化源同鄉亦不屈于豫紹興中各轉兩宮奉祠又鳳翔教授陰暉彭陽知縣李嘉皆守節不屈贈朝奉郎官其家一人

龔楫字濟道原之孫仕為兵部侍郎奉慶州人居和州兀木據和州楫率家屬襲之不克而死

方允武衢州人為宜興巡檢建炎三年與金寇力戰而沒曾志字仲常鞏之孫建炎初通判温州金酋巴八陷越惠獨不屈盡驅其家屬四十口同日殺之事聞官其弟與



三子及兄子皆將仕郎

宋昌祚和州鈐轄建炎初兀朮犯和州州人推昌祚權領軍事城破昌祚與倅唐璟歷陽令蹇譽司戶徐兢縣尉邵元通及指揮鄭立軍士胡廣皆死譙樓上軍士多不降保淝湖水砦事聞贈官錄其子弟

郭瓚內江人建炎初為汝陽令金人陷城瓚朝服坐廳事戟手大罵與二子俱死

金光庭羅源人累官光祿寺丞出知南陽郡建炎初金人陷南陽不屈而死舉家悉遭殲戮

王相如宣城人建炎初江右盜起被執逼令草檄相如奮髯曰吾雖死不能為賊作牒遂遇害盡室殲焉

趙不試太宗六世孫建炎初知相州金人求割地不試固守不下及州被圍又外援不至不試知不可為遂登城與金人約勿殺許之既啟門乃納其家井中然後以身赴井命提轄官實以土州人皆免于死

趙令晟燕懿王玄孫建炎中知黃州城陷不屈而死贈徽猷閣待制謚忠愍

趙振伯太宗八世孫建炎中通判鄭州守城力戰遇害贈

續文獻通考  
三  
朝請大夫官其一子

趙叔憑太宗之後建炎間為陝州都監金人圍陝州既以  
援兵不至城危時叔憑子官盧氏遺以蠟丸書曰人臣  
當死難况吾以近屬其可辱命耶死固其所也遂死之  
時通判王澥職官劉效陳思道馮涇李岳杜問縣令張  
玘蔣佐盧亨等五十一人俱死無降者

趙士跋濮王曾孫靖康末為右監門衛大將軍吉州團練  
使金人驅宗室北行士跋得間道遁去居邢州結土豪  
將舉義金人覺而殺之贈保寧軍節度使謚忠果

趙叔皎秦悼王四世孫建炎中為德州兵馬都監城陷為  
金人所執不屈而死

趙訓之字誨道秦悼王五世孫建炎二年知吉州永豐縣  
與尉陳自仁衛孟太后于虔州俱為叛賊所害贈訓之  
朝散郎直秘閣謚忠果自仁通直郎

趙聿之安定郡王叔東子建炎中為成忠郎金人陷潭州  
為所執大罵而死贈左監門衛大將軍時武經郎衛玠  
亦死之贈武經大夫皆官其家

李亘字可大兗州乾封人建炎中劉豫使守大名密謀圖



續文獻通考  
豫事洩而死贈官立祠曰愍忠又有武顯大夫孫安道  
為應天府兵馬鈐轄城陷不得歸謀挺身還朝為人所  
害而死贈忠州刺史

陳淬字君銳莆田人建炎中以淮南招撫使援建康與從  
子仲敏俱死贈拱衛大夫明州觀察使官其子壻

郝仲連昌化人建炎中為貴州防禦使權河中府事城陷  
不屈及其子皆死贈中侍大夫明州觀察使

韓青為熙河馬步軍第六將間行從劉惟輔為金人所擒  
罵不絕口死

彊霓自金歸宋知環州與其弟震堅守孤城城陷不屈死  
焉贈觀察使立廟西和州賜額旌忠

李伸知天長縣建炎中金虜陷城不屈而死

牛皓福州人為川陝宣撫後軍中部將與金人力戰而死  
時承信郎高萬且罵且戰與熙河路部將任安宣撫司  
隊官秦元薛琪張亨皆死于陣後皓安贈翊大夫官其  
家五人贈萬元等官錄其子

孫暉霍丘人靖康之亂率淮民團結保護鄉井擢招信尉  
建炎中金人將渡淮暉率射士民兵禦之城陷竟死于

勅書樓

屈堅為忠州防禦使建炎三年救陝府圍被害贈三官錄其家五人

方致堯寧國人賊戚方寇寧國致堯中流矢卧不能起遂為所執罵而死謚義烈詔立祠祀之

王棣守開德府建炎二十年九月金兵寇開德棣死之

孫安武長沙人為州學正金人入城安武率居民巷戰金人四面縱火人皆竄伏惟安武挺身罵不絕口死

劉玠潭州將官建炎中金人陷潭州玠挺身血戰中數十

矢死于陣民為立廟張栻作記

胡唐老字俊明宿之曾孫也建炎中知鎮江府潰卒戚方等欲犯臨安唐老諭以順逆衆環脅之唐老怒罵遂遇害贈徽猷閣直學士謚定愍時安撫司機宜鄭凝之亦以兵死詔官其家一人

王儔以通判真州權通判廣德軍建炎末戚方為亂與權判官李唐俊權法司潘僞權知廣德縣韋績權丞蔣瓊皆死俱贈卹

朱嗣孟樂平人以廣德司戶安撫戚方被害贈宣教郎官



其子

劉晏字平甫嚴州人以遠進士來歸累功直龍圖閣後授宣城為戚方所害贈龍圖閣待制官其子四人死所立廟曰義烈

鄭振字身叔仙遊人率鄉兵禦詹鈇又賊遇害廟食里中袁顯益陽人建炎中湘寇楊么猖獗顯請于縣宰魏舜臣團鄉兵以捍一日賊傾寨來戰顯極力鏖戰為賊所得賊欲用之顯罵賊不屈么置諸鼎鑊而死

程全休寧人為筠州都監金人犯江西守臣遁全攝州事賊劫掠至郡全領兵拒之兵少力罷賊遂剗其腹而去贈協大夫錄其子孫

孟彥卿忠厚從父建炎中通判潭州與瀆賊杜彥戰死于瀏陽時添差通判趙民彥邑士謝淳俱于賊力戰被執殺之贈彥卿民彥直龍圖閣官其家各三人淳贈成忠郎官其子希古後朱熹帥潭為請立廟

王煥知武當縣建炎中賊犯均州煥率邑人保山寨賊至或勸之遁煥曰使吾有此心則不能與邑人為此舉矣遂舉家死之

謝舉開封人為鎮撫使統制官建炎中李成陷魏川欲降之舉指腹示賊曰此吾赤心也自剖其心以死

薛良顯字貴勤瑞安人以河東轉運使與江寧亂軍周德力戰不勝而死贈卹甚渥

丁公膺醴陵人為高郵尉紹興初拒金兵力戰死之朝廷嘉其忠節官其子倚

梁楚電白人紹興中攝縣令交趾犯境力戰連斃數賊後城破被害高宗贈禮部侍郎

唐傑知扶風縣與金將馮宣戰宣愛傑欲招之傑奮曰吾

當死于陣不能降敵宣乃殺之

徐景知興化縣楚民胡德等寇掠馳入縣治景諭以順逆禍福賊怒欲害之景曰人誰不死得死王事亦何不可但勿傷百姓吾含笑入地矣賊義而不加害

王玠蘄黃鎮撫使司幹辦公事會鎮撫使孔彥舟謀叛玠開陳百端不聽入罵曰逆賊萬段彥舟怒并家屬沈之龍眠磯

范旺順昌人為縣巡檢司軍校紹興初順昌盜俞勝苛作亂土軍陳望者與射士張袞謀舉若應之旺叱不從凶



續文獻通考  
黨別其目而殺之妻子皆遇害賊平旺死迹在地隱隱  
不沒邑人驚異為設像城隍廟歲時祭享六年詔贈承  
信郎更立祠號忠節二十八年復詔立愍節廟以祀之  
呂祉字安老建陽人宣和初上舍釋褐紹興中知建康府  
累官兵部尚書叅謀軍事以鄴瓊叛執祉迫使趨劉豫  
祉大罵不從遇害贈資政殿大學士慶元間立廟賜額  
以旌其忠

李靚龍泉人紹興十年與虜戰敗死之詔贈兩官仍官其  
一子

舒繼明羅山人善射紹興間守信陽偽齊劉豫襲郟城矢  
盡被擒罵賊而死

唐敏求字好古當塗人為德化主簿盜起挺身率衆扞禦  
遂遇害贈升朝官補其子椿將仕郎

王師道字居中兗州人紹興中任吉州粟傳砦巡檢與賊  
戰于吳村而死立廟其地官其二子

楊載涪陵人金人立劉豫載願得白亦橫行虜中當手亦  
劉豫張浚壯其言使偕十士至金偽降載行反間豫果  
廢及欲办虜酋而十士已亡其八遂决南歸

續文獻通考  
朱勇利州都統捍金人有功<sup>戰</sup>于瓦亭寨被執罵不絕口  
死賜廟名忠節

朱友恭涇源路第一副將捍金人有功後被執不降遇害  
朱蹕湖州安吉人為錢塘令金兵迎戰歎敵使民得為逃  
計中流矢創甚猶叱左右負已擊賊後數日遇害

王倫大名人紹興十四年以行人使金金欲以為平灤二  
路都轉運使倫曰奉命而來非降也金脅以威倫拒益  
力俾縊殺之倫遂冠帶南鄉再拜慟哭曰先臣文正公  
以直道輔相兩朝天下所知臣今將命被留欲污以偽

職臣敢愛一死以辱命遂就縊於是河間地震雨雹三  
日聞者哀之

姚興相州人以武功累遷荆湖南路兵馬副都監紹興二  
十一年金人渝盟興隸都統王權麾下時權奔仙宗山  
嚴兵自衛興告急數不應初李二者嘗有私恩于權因  
得出入軍中竊權旗幟以遺金人至是金人立權旗幟  
以誤興興奔之父子俱死焉詔贈容州觀察使謚忠毅  
立廟戰所賜額曰旌忠

孫知微高宗時通判舒州淮賊劉忠薄舒州知微繕城郭



治甲兵力與之抗久而不下及入舒知微被執又不屈  
忠怒鬻食之後朝廷官其二子

李明高宗時金兵入犯明從宣撫使揚存中力遏其衆外  
援不繼死之廕其子守中為進武校尉

李邁字彥和龍泉人紹興中以承信郎與金人戰于西京  
天津橋死之

劉宣為秦鳳路兵馬都監密遺蠟書與吳玠相約且欲率  
金將任拱等以所部歸朝金人覺取宣縲繫之家屬配

曹州

韓浩知淮州高宗時金兵攻濰州城陷浩與通判朱廷傑  
皆力戰死北海縣丞王允功司理王震皆全家陷沒浩  
特贈三官官其家三人餘各官其家一人

王忠植太行義士紹興中以功為河東經畧安撫使為叛  
將趙惟忠所執不屈而死贈奉國軍節度使開府儀同  
三司官其家十人

唐琦本衛士建炎中欲襲擊金將琶八不克而死詔立廟  
賜名旌忠

馬俊太平州慈湖砦兵紹興中周青等據州叛俊隸青左

續文獻通考  
右得其陰謀潛結其徒期殺賊于是伺青上馬斫中頰  
而其徒不敢前遂與妻子俱遇害贈俊修武郎立祠號  
登勇

翟興字公祥河南伊陽人紹興元年為忠州團練劉豫憚  
之啗裨將楊偉以利偉殺興攜其首奔豫弟進知河南  
府亦為賊楊進所害俱贈官錄其家

劉惟輔涇州人任熙河副總管為金人所執誘之百方竟  
不從而死詔贈昭化節度使官其子孫十二人立廟成  
州號忠烈

朱良字良伯仕海鹽尉時金人分兵入境良集射士百餘  
奮而前然力不敵竟死事聞官其子思孜等

劉十六即瑞金人金虜犯境十六即昆弟三人義勇戰死  
岳飛以聞詔立祠旌之

魏彥明開封人通判延安金人陷西城彥明死節詔贈中  
大夫官其一子

郭正孫邛州人官大府寺丞帥興元金人內侵屹守孤城  
三戰三却左右勸之避正孫不從遂死于敵

金從龍浮梁人知廬州虜寇大至力不能支死之贈官廕



續文獻通考  
其子

張文之樂平人通判濠州金兵至被執送燕山欲授以官不屈囚之土窟後王朴清于囚得一家書附還朝廷悼嘆月給恤其家官其子孝忠

黃友字龍友平陽人也金人入寇友通判澶州戰敗被執不屈死之帝書忠節傳家四字旌其門

鄭驤字潛翁玉山人建炎初以直秘閣知同州金人來寇援絕力孤城陷虜衆欲降之不屈曰所謂太守者守死而已遂死之詔贈通議大夫謚威愍官其子五人後復

加贈樞密直閣學士立祠同州賜廟額曰愍節

毛士毅富川人為化州石城令李接反來攻城士毅謂尉曰吾與君當以死衛百姓糾合義丁與賊戰衆寡不敵遂罵賊死高宗贈承事郎

劉位招信人知滁州節制徐泗二州軍事金人入寇遣使誘降位斬其使後出戰中流矢歿于陣贈建寧軍節度使建廟滁陽號剛烈

邊知章字公望通判開德府金人犯闕尋以和退明年冬虜大至城下知章軍潰死之贈朝散大夫官其二子

常永壽以統制官紹興未與子承節同死于和州父子同贈官

种朴洛陽人諤之子以父任右班殿直累遷熙河蘭會鈐轄兼知河州時蕃部叛屬羌何章入寇帥胡宗回使朴討之朴至州纔二日賊鋒方銳且盛寒欲姑徐之馳檄至六七不得已遂出兵羌知朴來伏以待朴遇伏首尾不相應朴殊死戰為賊所殺事聞贈雄州防禦使官其後十人

張玘字伯玉澠池人紹興末以御營宿衛軍前都統與金人力戰于海州北中流矢卒贈正任觀察使官其後九人廟號忠勇孝宗即位又命祠于戰所贈清遠軍承宣使子世雄武節大夫

陳亨祖淮寧大豪紹興末以功知海寧府與金兵力戰舉家五十餘人皆死贈容州觀察使立閔忠廟于光州劉泰樞密院忠義前軍正卒也金人犯壽春泰身被數十創死贈武翼郎官其家三人

郭僕字同升祥符人以父任調東海縣尉歷遷通判全州權梁宰未行會賊張項已逼縣境衆止之僕曰安逸則



就艱危則辭非我所學竟至縣約束吏卒誓以死戰賊聞之偽降既入邑為變官皆竄伏僕曰吾為宰義不可去端坐公署賊徒至僕大罵不絕口遂遇害詔贈承議郎錄其後二人

王觀國登紹興壬辰進士授陝州宜興縣尉遇黃巾賊不屈遇害事聞詔贈官一等

王拱建康府前軍統制隆興五年與金人力戰于江北而死贈正任觀察使即其峇立忠節廟又忠亮大夫朱贊亦死之贈承宣郎

吳庸淳熙間李接作亂庸與同郡徐邦直唐捷起兵禦不克庸歿于陣徐與唐罵賊而死帥劉惇上其事俱贈承宣郎仍官其子

王輝貴州人嘗為粟傳砮巡檢淳熙二年擊茶寇為賊所得欲全之含血大罵遂死贈忠州刺史與恩澤二人立廟羅坡

楊震仲字草父成都人淳熙中吳曦招之不從飲毒死贈朝奉大夫直寶謨閣官其二子表其里曰義榮謚節毅立廟旌忠

續文獻通考  
吳政寧宗嘉定十二年女直寇西和成鳳州入黃牛堡政  
死之

李誠之字欽茂東陽人寧宗時知蘄州金人南侵城陷子  
士元戰死誠之引劍將自刎呼其孥曰城已破汝等宜  
速死無辱妻許及婦若孫皆赴水死事聞贈朝散大夫  
秘閣修撰封正節侯賜廟曰褒忠

秦鉅字子野檜曾孫通判蘄州城破自焚而死贈秘閣修  
撰封義烈侯祀于褒忠廟子浚渾同死贈通直郎淳祐  
十二年加封鉅義烈顯節侯時教授阮希甫防禦判官

趙汝標皆死之同時死事者蘄春主簿甯時鳳錄事叅  
軍兼司戶杜諤監蘄州都大監轄蘄口鎮倉庫嚴剛中  
各贈官有差又統制官孫忠小將江士田陳興曹金丘  
卞軍士李斌等皆鬪死司理叅軍趙與裕奪關出外求  
援而全家十六人皆沒黃州陷守臣何大節亦投江死

陳霖字傳容泉州人嘉定中為瑞金尉不屈于賊而死  
徐梅龜壽昌人為霍丘尉虜寇犯境梅龜與子尚古皆死  
之理宗嘉其忠贈梅龜宣教郎尚古承信郎各官其子  
劉宥知天水縣金兵犯境掠宥行橐視其誥命曰隨我去



官北朝宥罵曰我為南朝鬼不為番賊官遇害

彭義斌理宗寶慶元年領兵徇真定嚴實以蒙古兵來襲義斌死之

陳寅咸子升卿孫知西和州寶慶年蒙古入西和寅謂妻杜氏可避兵鋒杜氏厲聲曰安有生同君祿死不共王事者寅死之杜氏飲藥自殺二子及婦俱死毋傍賓客同死者二十八人

黃復字乾叟沙縣人寶慶二年第進士後攝滁州因虜攻城援不至殁在圍中遺子書曰父老矣食君之祿繼之

以死雖死猶生也

賈子坤童川懷安軍人為西和州推官寶慶中虜至城陷與其家人十二口俱死之

舒瀛字登甫奉化人登寶慶二年進士第授衢州西安尉兵難卒起瀛先衆捍敵死之朝廷嘉其忠官其子模

曹孝先字元先奉化人官承直郎任楚州錄事叅軍寶慶乙酉沒于王事贈通直郎官其子詵立廟號旌忠

劉純字君錫建陽人以父廕補沙縣簿紹定間調湖北帳幹知邵武縣會率兵招降下瞿賊為賊所得不屈死之

續文獻通考  
事聞贈朝散郎與二子下州文學後又封壯義侯謚忠  
烈純之族韜謚忠顯子羽謚忠定珙謚忠肅 謚忠簡  
純謚忠烈為五忠劉氏

趙師檟淮右人以罪客游于閩紹定中寇起汀州郡司農  
丞潘景伯嘗守高郵知師檟荐于提刑王夢龍俾統兵  
禦尤溪賊大書旗上曰誓不與賊俱生轉戰田中馬陷  
于泥賊斫左臂猶以右手殺賊力盡大呼曰師檟報國  
死于此矣遂歿嘉熙初都丞吉王堃上其事贈武節郎  
民為立廟名忠愍

高談字景遂邵武光澤人紹定二年為旁郡賊執欲其率  
鄉子弟東破武陽談唾賊大罵遂遇害而里人賴以免  
曹友聞字允叔彬十二世孫端平初權知沔州與蒙古兵  
戰于鷄冠隘與弟萬皆死贈友聞龍圖閣學士大中大  
夫賜廟褒忠謚曰節官其二子承務郎壻迪功郎贈萬  
武翼大夫官其二子成忠郎

高稼蒲江人魏了翁同產也知沔州端平二年蒙古濶端  
入沔稼死之贈龍圖閣學士謚曰忠

李復明為江陵統制端平三年蒙古將忒木解寇江陵復



明死之

揚壽孫為雲安軍主簿端平中元兵至中江縣與蔣官何  
庾安惟臣田廣直友坤等連戰二日俱死之贈恤有加  
劉銳知文州嘉熙元年元兵攻急銳集其家人盡飲以藥  
而死家素有禮法幼子同哥方六歲授以藥猶下拜受  
之左右感動銳父子三人登文王臺自刎死  
趙汝鼎宣城人為文州通判城陷不屈元人先斷其兩臂  
而後鬻殺之

何克漢州德陽人通判黎州攝州事元兵破關自刺不死  
百方誘之終不從臨死時東望再拜曰臣夫婦同死可  
以對趙氏無愧矣上下感泣同死者四十餘人男士麟  
孫駒行從子仲桂先克死惟長子士龍得免

蹇彛潼州通川人通判金州端平中元兵攻陷金州彛舉  
家死焉弟維之利州行叅軍事亦迎敵力戰死官其子  
王進字純文饒州樂平人紹定間為固始縣簿攝邑事金  
兵犯淮守令望風遁去進度力不能禦懷印自投于井  
而死

鄭勳字景周興化縣人嘉泰壬戌登第端平中知博羅縣

續文獻通考  
熊喬部下回戍卒焚掠州境或勸勲避其鋒勳曰吾為  
長官見賊而去如吾民何衣冠坐廳事賊至諭以禍福  
不屈而死事聞贈朝奉郎

陳隆之為制置使成都將田世顯以城叛降于蒙古隆之  
舉家數百口死于元兵贈徽猷閣待制加與兩子恩澤  
賜謚立廟

吳從龍字雲奉化人紹定中以建寧都統制為先鋒援不  
至被擒不屈而死朝祀恭揚二州賜額褒忠官其弟從  
虎

孫益泰興人紹興中李全犯揚州應縣令王燿募為兵後  
賊勢甚盛身先赴敵死之贈保義郎官其子一人同時  
顧緒顧珣皆戰死贈恤亦同

王仙蜀都統守涪州二年城破自刎斷其吭不死以兩手  
自擗其首而墮

曹琦蜀進士知南平軍被執脫身歸制置司辟主管機宜  
文字聞統制趙安以城降就守禦地自經死

侯畱字道子樂清人寶祐五年制置使賈似道辟通判海  
州與山東賊李松壽鏖戰于連山闔室遇害立旌忠廟



于海州謚節毅仍立廟其鄉

張順民兵部將也開慶中與張貴同救襄陽不克而死立廟祀之

陳元桂撫州人開慶元年元人侵臨江元桂力疾督戰有勸其移治者曰時事如此與其死于饑寒盜賊孰若死于守土之為光明俊偉哉遂死之詔贈待制謚正節賜錢二十萬官其二子勅立廟死所賜額褒忠

曾頊紹興人開慶己未為瑞州錄事叅軍以州命行各縣賑恤饑民值元兵至被擒不屈死之事聞贈秩官二子

羅夢棧新喻人景定元年兵入靖安夢棧死之贈宣教郎官一子

許彪孫奕之子為四川制置司叅謀官景定二年知瀘州劉整將叛降于元命彪孫草表彪孫曰腕可斷筆不可書合門服藥死整既降襲都統張桂營桂及統制金文德戰死納溪曹顛合門死之又景定四年沔州都統胡世全護糧運至虎象山戰死咸淳二年元兵取開州守將龐彥海死之德祐元年瀘州守梅應春以城降珍州守江彥清巷戰死之

密祐廬州人守隆興咸淳中元兵下隆興密祐為都統兵  
敗被執不屈而死

張漢英奉化人為樊城守將時樊城被圍四年與都統制  
范天順牛富力戰不降既城陷漢英死焉天順仰天嘆  
曰生為宋臣死當為宋鬼于守處縊死牛富身被重傷  
以頭觸柱赴火死裨將王福見富死嘆曰將軍死國事  
吾豈宜獨生亦赴火死後天順贈定江軍承宣使

史季儉威州棋城主簿也成都陷子良震與壻楊誠夫爭  
先為死各持贈兩官與一子下州文學

王翊字公輔郫縣人嘉熙元年為制置使丁黼叅議官元  
兵破蜀朝服赴井死時轉運副使蒲東卯亦死之元兵  
屠漢州權州事劉當可判官邵復錄事叅軍羅由司戶  
叅軍趙崇啟知雒縣羅君文皆不屈而死復雍六世孫  
也兵入眉州知丹稜縣馬仲燁死之取簡州簡守李大  
全死之邛守趙晨力戰死之至遂寧民兵趙用拒戰臂  
已斷而戰不休至重慶進士胡天啟夫婦同罵賊死翊  
與趙汝鼎同立廟賜謚餘褒恤有差寶祐六年元兵援  
吉平隘守將楊禮周德榮死之拔長寧守將王佐父子



俱死至閬州推官趙廣死之至蓬州轉運使施擇善死  
之至順慶帥守段元鑑堅守為麾下殺之以降

陶居仁蕪湖人為鎮江錄事叅軍元兵來攻城陷被執居  
仁曰得以死報朝廷夫何憾竟不屈為所殺護棺還家  
汴流數百里不時而至鄉人異之為立祠

張孝忠淮人德祐初呂文煥道元兵東下知信州謝枋得  
走入安仁調孝忠逆戰團湖坪矢盡揮雙刀擊殺百餘  
人後伏兵發孝忠中流矢死

王世昌德祐初權瀘州安撫使後元兵逼城誓不屈節城

破自經死

邊居誼隨州人為新城守將咸淳中元人進逼新城居誼  
堅壁不降呂文煥至城下招之居誼射煥中其右臂率  
所部三千死戰皆沒居誼赴火死事聞贈利州觀察使  
立廟死所

趙昂發字漢卿昌化人德祐元年權守池州元人陷池州  
昂發死之初元人遊騎至李王河都統張林諷昂發迎  
降昂發瞠目視林不敢復言已而林陰遣人納款昂發  
知事不濟乃謂妻雍氏曰城將破吾守臣不當去汝先

出走雍曰君為命官吾為命婦君為忠臣吾獨不能為忠臣婦子昂發笑曰此豈婦人女子所能也雍曰吾請先君死昂發笑止之明日乃散其家貲與弟姪僕婢悉遣之及元師薄城昂發晨起書几上曰國不可背城不可降夫婦同死節義成雙遂與雍氏盛服同縊從容堂伯顏入城問太守安在左右以死對深歎惜之命具棺衾合葬祭其墓而去

唐震字景實會稽人為饒州知州元軍入饒遣使來取降款通判微諷震降震怒叱之曰我何忍偷生負國也域中年少感震言殺元使者已而城陷執牘使署降震不屈遂死焉兄椿與家人俱死贈文華閣待制謚忠介廟號褒忠官其二子震客馮驥何新之後俱死節

江萬里都昌人以故相家居聞元兵破襄樊乃鑿池芝山後圃扁其亭曰止水人莫喻其意及城欲破遂赴止水死左右及子鎬相繼投沼中積屍如疊翌日萬里屍獨浮出從者歛葬之贈太師益國公謚文忠

鮑廉知臨江軍元人徇臨江廉死之

馮仲燁知丹稜縣元兵入眉州仲燁死之



米立為江西都統元軍畧江西立逆戰於江坊兵敗被執  
不降繫獄制置使黃萬石舉軍降元元行省遣萬石諭  
立曰吾官銜一牙牌書不盡今亦降矣立曰侍郎國家  
大臣立一小卒耳但三世食趙氏祿趙亡何以生為立  
乃陳上生擒合死之人與投降者不同萬石再三諭之  
不屈遂遇害

阮應得守無錫德祐中蒙古兵入無錫應得死之

王汝翼知廣德縣德祐中元人入廣德汝翼死之

司馬夢求監岳州沙市城鎮德祐中蒙古阿里海涯入岳

州沙市城夢求死之夢求司馬光五世孫也

夏椅安慶通判蒙古兵犯安慶知府范文虎以城降椅力  
不能自為曰有死而已乃飲藥卒衣襟中有遺筆云職  
當其遽厄逢其否負吾君親方寸亂矣命無所逃當死  
而死五十六年歸其天理

趙與穉守寧國德祐初蒙古陷寧國與穉死之

姚訾知常州德祐初蒙古伯顏陷常州訾與通判陳炤都  
統王安節死之炤字光伯常州人城陷或勸走常熟炤  
曰去此一步非死所矣遂止死焉安節堅之子也守常

州力圖恢復不克而死贈訾龍圖閣待制炤直寶章閣  
並官其子時節度判官胡應炎武進知縣包圭俱晉陵  
人亦同戰死

徐道明常州玄妙觀道士德祐初元兵屠城道明知太守  
姚訾死守取觀之文籍置石函藏坎中危坐燭香讀老  
子書兵至以刃脅使拜不為動遂死之

汪立信新安人德祐元年賈似道將出師召立信為招討  
俾就建康府募兵以援江上諸郡既至建康守兵悉潰  
四面皆元兵立信知事不可成率所部四十人至高郵  
欲控引淮漢以為後圖及聞似道師潰嘆曰吾今日猶  
得死宋土乃扼吭而死

劉霖昌州永川人後居瀘州安撫使梅應春以城降元霖  
說合州張珏潛斬闕入城殺應春復瀘州珏以霖知南  
平軍後卒死于兵

彭震龍永新人知永新縣值元兵至城守不下親黨劉槃  
內應執震龍去震龍罵不絕口腰斬之

蕭燾夫與兄敬夫吉安人見文天祥起義兵兄弟協贊彭  
震龍謀復永新縣縣屠兄弟同死之



續文獻通考  
尹玉寧都人從文天祥勤王死于伍牧贈濠州團練使官  
其二子賜田二頃以恤其家

程洙休寧人淳祐十年進士授貴池縣簿調上元縣德祐  
元年建康陷百官投牒降附程洙自縊而卒

李成大字實夫建昌人德祐初知金壇縣元兵至與戰不  
勝吏民脅之降乃潛與胡用存謀復金壇事泄繫獄至  
殺其二子終不屈死贈直秘閣謚忠節

李天勇臨川人德祐初元攻饒州天勇統強壯應援兵敗  
與張忠孝俱死之

李芾字叔章由廣平為汴人官潭州知州元兵圍潭日以  
芾慷慨登陴與諸將分地而守民老弱皆結保伍相助  
不令而集芾日以忠義勉其將士死傷相籍猶乘城殊  
死戰城將陷召帳下沈忠遺之金曰吾力竭分當死吾  
家人不可辱于俘汝盡殺之而後殺我忠泣而諾取酒  
飲其家人盡醉乃徧泐之芾亦引頸受刃忠縱火焚其  
居還家殺其妻子復至火所大慟舉身投地乃自刎叅  
議楊震赴園池死妻妾奔救無及遂皆死幕僚陳億孫  
顏應焱皆死潭民間之多舉家自盡城無虛井縊於林

木者相望寶慶通判曾如驥亦不屈而死事聞贈帶端明殿學士謚忠節

尹穀衡州進士寓居潭城元兵至知事不可為乃為二子冠招鄉人行冠禮鄉人曰此何等時行此迂濶事穀曰正欲令兒曹冠帶見先人于地下耳既畢禮與其家人自焚潭太守李芾命以酒酹之

李長庚為湘潭丞元兵至被執不屈死之

趙良淳汝愚曾孫為安吉州知州與提刑徐道隆固守元兵圍安吉范文虎致書誘良淳降良淳焚書斬其使既

而戍將吳國定開門納元兵良淳閉閣自經道隆見執守者少怠亦赴水死

鄧得遇字達夫邛州人德祐二年為廣西提刑守蒼梧元人徇桂林州南望拜書紙曰宋室忠臣鄧氏孝子不忍偷生寧甘溺死彭咸故居乃吾潭府屈公子平乃吾伴侶優哉游哉吾得其所遂投南流江而死

徐夢發浦城人登嘉熙二年進士第累官朝議大夫廣奉招捕使德祐二年元兵下江南夢發守仙霞襲兵猝至左右皆潰夢發獨踞坐大詔遂遇害



李申巽知上猶縣德祐二年元兵攻上猶申巽死之邑人李梓一家四十七口俱死之

豐存芳字公茂鄞人稷玄孫也為太平州倅景炎元年蒙古兵至知州孟知縉謀以城降存芳諫不聽詈之知縉遂引蒙古兵屠其家同死者十八人卒方義竊其八歲孤匿民間得存其祀

劉子荐字貢伯安福人為廣西經畧使叅議官元兵至靖江時宋主已入燕子荐取笏書曰我頭可斷膝不可屈堅守而死

呂文信文德弟也德祐初以沿江副使咨議官與元兵遇于白鹿磯戰死贈定遠軍承宣使官其子立廟賜額時河湖巡檢張興宗亦死之贈武翼郎仍賜錢官其子鍾季玉樂平人德祐時為大都提點坑冶元兵渡江徙寓建陽兵至不屈死之

潘方平陽人監慶元府市舶慶元降元方不屈死之耿世安為兩淮都撥發官迎元兵鏖戰身被七創猶能追殺收兵還至數里歿贈五官立忠武廟于淮安

丁黼成都制置使也與元兵力戰死于石筍街賜額立廟

王孝忠為鎮江前軍統制兼淮東路分戍淮陰楊貴叛孝忠率衆迎戰俄永軍統制朱信降賊孝忠力不敵死焉姜才濠州人貌短悍知兵善射騎為通州副都統與元兵屢戰屢勝復守揚州元將使人招之才曰吾寧死豈作降將軍耶被執死之

蕭龍雷字顯辰新城人建昌降元與同里人黃巡檢起兵圖興復度勢不可支將奔入閩為同安武人徐浚冲獲送縣縣尹劉聖仲素與龍雷有怨殺之後聖仲于小孤山見其神驚死

宋應龍以諮議官寓泰州元兵至裨校開門迎降應龍與其妻自縊園中

褚一正字粹翁廬州人武舉進士為提刑諮議督戰高沙被創竟沒于水知興化縣胡拱辰縣破亦死之

張鏜衡山人浚之後益王立詔天下勤王鏜起兵衡山得民兵數千與文天祥接應既而兵敗被執元叅政崔斌欲降之鏜罵曰今日降而死何以見我祖魏國公于地下斌令述起兵本末鏜奮筆斥罵千百言斌怒殺之

鄒鳳字鳳叔吉水人從文天祥勤王死事同死者泉州陳



龍復廬陵劉子浚劉沐龍泉孫臬永新彭震龍蕭陶寧  
都陳繼周蜀人張忭太平州步卒呂武安豐軍人鞏信  
太和蕭明誓丞相範從子杜許閩人林琦温州人徐臻  
幕下書史蕭資職書司金應樂安何時贛州陳子敬何  
陳二人隱竄不知所終

劉士昭太和人嘗為鍼工與鄉人同謀復太和縣事敗血  
指書帛曰生為宋人死為宋鬼赤心報國一死而已以  
帛自縊死又有王仕敏者與士昭同謀而敗題其裾曰  
此生無復望生還一死都歸談笑間大地盡為腥血汚  
好牧吾骨首陽山臨刑嘆曰恨吾失聲不能大罵

趙孟壘合州人為金華尉臨安降與從子由鑑懷太皇太  
后書詣益王擢宗正寺簿監軍復明州戰不屈磔死

孟采福王與芮從子也元兵駐紹興采謀舉兵事泄執至  
臨安范文虎詰其謀逆采詬曰賊臣負國厚恩共危社  
稷我帝室之胄欲一泄宗社之恥乃更以為逆乎文虎  
怒驅出斬之過宋廟呼曰太祖太宗列聖之靈在天何  
以使孟采至此都人莫不隕涕既死雷電晝晦者久之  
上官夔萬州守將也元兵圍城夔戰守甚力招之降不從

城陷巷戰而死

吳楚材名炎建昌南城人德祐元年建昌降明年春楚材還其鄉領村糾集民兵攻城元兵三道蹙之奪其長梯鐵鈎因進攻領村不得入事聞益王府元帥承制遷楚材宣議即帶令太社令知建昌軍俾聚軍圖再舉時江西制置使黃萬石匿其命楚材既失利且乏援走光澤為人所執及其子應登以獻郡遣錄事婁南良訊之曰何為錯舉楚材抗聲曰不錯不錯如府錄所為乃大錯耳府錄受宋官爵今乃為敵用事還思身上綠袍自何

而得吾一鄙儒特為忠義所激為國出力事雖不成正不錯也南良媿而語塞後為江西制置招討使斬其父子傳首諸邑益王聞而哀之贈官朝奉即邵武境上立廟賜名忠勇

黃介字剛中分寧人德祐初率鄉兵為保聚計北兵奄至面中六天不動復中十三天倚柵而死妻劉被虜子用中逃不死及壯求母十三年始獲人稱黃孝子

張珏字君玉鳳州人德祐初知重慶府守節不屈而死時閬州守將楊大淵推官趙廣蓬州守將張大悅運使施



續文獻通考  
卷之九  
擇善皆死節

趙立字德修重慶人德祐初為大社令湖北提刑使趣蜀諸將入衛不成自沈于水

周偉德祐間為浮梁丞元兵起偉曰以守無城以戰無兵奈何然受人之命而不為其事非仁也食人之祿而不死其難非勇也卒死之

趙與擇秀王嗣也德祐二年出鎮瑞安與守臣方洪同伏節而死又有趙孟錦者襲元兵不克而死

徐道隆字伯謙武義人德祐初以江陵提點刑獄入援臨

安為元兵所執與子同赴井死贈官賜謚厚恤其家立廟吉安

洪福夏貴家僮也從貴積勞為鎮巢雄江左軍統制江北降福與子大淵大源復之貴降元招福不聽使從子往福斬之後為貴詭誘破城先戮其子次及福福大罵數貴不忠請身南向死以明不背國也聞者流涕

高應松字實畝長樂人開慶元年進士官翰林權直德祐末元兵至臨安應松不肯草降表後從弟昂至燕絕粒不語越七日卒

陳奉安仁人益王即位奉領江東安撫使師屯火焚山戰潰復起兵敗于積烟山與弟年同死之

林空齊永福人失其名舉進士歷知縣解官家居益王立張世傑圖泉州乃率鄉人黃必大劉仝祖即其家開忠義局起義兵復永福值王積翁以福安送款約北兵屠永福空齊乃盛服坐堂上嚙指血書壁曰生為忠義臣死為忠義鬼俄見執不屈而死

李庭芝字祥甫由汴徙為應山縣人恭帝時守揚州兀朮圍揚父庭芝與指揮使姜才守禦益力及臨安既陷兀朮以太皇太后手詔諭降庭芝登城謂使者曰奉詔守城未聞以招諭降也及帝如瓜州太皇太后復賜庭芝詔庭芝不答及夏貴以淮西降兀朮復遣貴降卒至城下示庭芝庭芝曰吾惟一死而已使者復持詔招之庭芝開壁納使者斬之焚其詔於壁上已福州使至庭芝與姜才將兵七千趨泰州兀朮驅庭芝妻子至壁下招降會姜才疽發背不能戰泰州守將胡惟孝孫貴開門納元兵庭芝赴蓮池中水淺不死遂與姜才俱就執兀朮責其不降才曰不降者我也憤罵不已皆見殺揚



聞者莫不泣下

徐應獫字巨翁江山人為太學生景炎元年蒙古伯顏入臨安應獫與其二男琦松一女元娘同登樓自焚諸僕撲火救免乃同赴井死益王立贈秘閣修撰

黃俊為廣州摧鋒將景炎元年蒙古軍入廣州俊死之苗再成為直州守將景炎元年蒙古兵陷直州再成死之趙時踐字容月宋末人僑居采石德祐間攝建平縣事元人南下入縣搥鼓禦敵勢窮與妻子僕妾九人赴溪潭死焉

馬瑩宕昌人以六郡鎮撫使守咸淳府元將楊文安與瑩同里招降不聽既而城陷悉力巷戰死之

兵必明保昌人官韶州僉判德祐中元兵逼城下必明不屈為敵所殺白血流地韶人哀其忠節立祠祀之

馬堅為靜江守將時阿里海牙克靜江府斷其首猶握拳奮起立踰時始仆堅既死部將婁鈐轄等守月城求牛米糗饑而降既得食之擁一火炮然之聲如雷震城皆崩烟焰蔽天外兵多驚死者火息入視之灰燼無遺

黃文政淮人戍蜀軍潰間道走靜江馬堅邀與同守城破

文政被執大詔不屈元人斷其舌以次劓刖之文政舍胡叱咄叱死不絕聲

熊飛曾逢龍興元人戰於南雄敗績曾死之飛奔韶州元人圍韶州守將劉自立以城降飛率兵巷戰敗赴水死陳文龍字君貴興化人俊卿之後益王稱制時守興化被執元兵欲降之文龍指其腹曰此皆節義文章也可相逼耶卒不屈乃械送杭州文龍不食死

趙時賞張日中德祐二年元李恒襲文天祥於興國縣天祥出走師潰於空阡時賞日中皆死之

趙希洵宗室子居宜春德祐中以廣東轉運使勤王文天祥兵敗興從子必向被囚俱不食而死

陳瓚文龍從子也守興化元唆都攻之瓚閉城拒守唆都臨城諭之矢石雨下城破巷戰終日獲瓚車裂之

張德興淮安人景炎二年與淮西野人原寨劉源等起兵興復司空山與黃州壽昌未幾元襲破司空山復陷壽昌德興死之

劉伯文吉水人景炎二年伯文詣督府受文書結約遠近為巡兵所執斬于袁市慷慨自引一不累人



陳學心安仁人歷官高州知府謝枋得起兵令守安仁元兵至力戰而死時餘干張仁且亦率鄉兵應枋得力戰而死

楊恕字仲如四明人篤學力行歷陞憲司知事宋祚將危以忠義自勵不食數日赴菱塘而死

袁鏞字天與鄞人咸淳進士尚氣節元兵至鄞鏞往軍前責以大義元將竒其<sup>才</sup>脅令降縱火燎之鬚髮盡不少變遂死其日家人驚悼赴水死者十有七人

馬發知朝州景炎中蒙古兵陷朝州發死之

顏思立顏起巖鞠叔華聞文丞相開府于汀相結赴義後元兵奄至三人同日死之

張烈良為河南制置使帝昺祥興元年起兵應厓山與元阿里海牙戰敗死之海南州縣皆陷沒趙與珞亦死之陸秀夫字君實鹽城人以左丞相輔帝昺于崖州儼然如治朝祥興二年元張弘範攻厓山張世傑兵潰秀夫奉帝昺赴海死時丹徒茅相以秀夫薦授兵部侍郎亦同死於海

高貴祥符人舉進士累官知高郵府扈從之海上擢樞密

使與陸秀夫同死厓山

彭呂泰和人元兵陷虔呂不屈入廣從文丞相赴難死

蕭資吉水人文丞相幕下書史與元兵遇死之

吳希夔安福人文丞相起兵夔自以名通于督府後遇元軍衆寡不敵一門三十口俱死之

伍隆起新會人三世仕宋宋末隆起率義兵從帝昺于厓山與元將張弘範力戰不屈其麾下謝文子殺隆起降弘範宋相陸秀夫惜之刻木為首以葬又募人執文子戮以祭墓

孫臬文丞相之妹壻也丞相方擁兵出贛臬為叛者所陷不屈死之

劉昂孫江陵人官翰林學士德祐初從二王至厓山陸秀夫負王赴海死昂孫亦驅家屬並輜重沈海不死為元兵所執榜掠無完膚一夕得脫卒陷海死

劉洙廬陵人文丞相隣曲也兵敗被執至豫章與長子同日被刑

張雲吉水人城降元雲不勝忿乃謀興復引所部夜襲元營天明戰渴赴江飲水元軍衝擊之雲赴水死



趙孟濟以功知清江後元兵至城陷孟濟死之

張世傑范陽人以樞密副使越國公立衛王昺于厓山既敗欲浮海再圖恢復颶風大作舟人欲抵厓世傑曰無以為也為我取辦香來乃焚香祝天曰若天不欲復興宋室則大風覆我舟舟遂覆世傑死之

汪繼宗歛人生淳祐間見國祚不競有恢復中原之志福王與芮召見愛之妻以女宋亡自以受國恩不即死無以見祖宗于地下遂不食而卒

王用龍進賢人宋亡用龍誓不為異國民後為元鎮守兵所獲碎甕噉而死

謝君直名枋得號疊山信州弋陽人景定甲子江東漕闡校文發策問權姦誤國趙氏必亡忤賈似道貶興國軍三年遇赦得還元兵南下郡城潰棄家入閩至元二十三年御史程文海承旨留夢炎等交薦累召不赴二十六年春正月福建行省叅知政事魏天佑復被詔旨集戍將迫促上道臨行以詩別常所往來者曰雪中松青青扶植綱常在此行天下豈無龔勝潔人間不

清義高便覺生堪捨禮重方知死甚輕南八

男兒

皇天上帝眼分明夏四月至京師不食死  
年六十有四秋八月子定之奉柩歸葬門人誄而題之  
曰文節先生謝公墓

家鉉翁眉州人宋末知建寧府兼福建轉運副使後簽書  
樞密院事元兵迫郊鉉翁獨不署降表宋亡旦夕哭泣  
不食飲者數月成宗即位放還賜號處士錫賚皆不受  
羅一理進賢人宋亡謝枋得為江西招諭使一理偕弟起  
潛赴義被擒不屈皆腰斬弟臨刑謂一理曰今日得死  
所矣

文天祥吉水人宋右丞相少保信國公初元張弘範襲執  
天祥於五坡嶺天祥吞腦子不死至潮陽見弘範左右  
命之拜天祥不屈厓山既平弘範謂天祥曰國亡丞相  
忠孝盡矣能改心以事宋者事大元將不失為宰相也  
天祥泣然出涕曰國亡不能救為人臣者死有餘罪况  
敢逃其死而貳其心乎乃以天祥北去道經吉州痛恨  
不食八日猶生乃復食至燕館人供帳甚盛天祥不寢  
坐達旦遂移兵馬司設卒守之既而丞相孛羅召見天  
祥入長揖欲使跪天祥不屈孛羅怒命囚於獄所作有



正氣歌已而又召天祥於獄欲用之天祥固辭欲殺之  
不果後以中山狂人之變乃殺之

續文獻通考卷之六十三終



經  
文  
書  
通  
考

三  
五